

Headlines

1. राश्ट्रीय गीत वंदे मातरम दे 150एं बरे दे मौके पर लोकसभा च अज्ज विशेष चर्चा होग- जिसी प्रधानमंत्री नरेन्द्र मोदी शुरु करोआगंन।
2. पहाड़ी जिले डोडा च सुरक्षाबलें आतंकवादियें दे छप्पने आले इक गुप्त ठिकाने दा पता लाइयें असला-बरुद बरामद कीता ऐ।
3. DGP नलिन प्रभात होरें जम्मू-कश्मीर पुलस- CRPF ते श्री मात वैष्णो देवी श्राईन बोर्ड कन्नै बैठक लाइयें कटड़ा ते एदे आले-दोआले दी सुरक्षा स्थिति दा जायजा लैता।
4. आई.आई.टी जम्मू लगातार दुए बरे बी स्मार्ट इंडिया हैकेथॉन दे साफ्टवेयर संस्करण दे ग्रैंड फिनाले मेजबानी करा'रदा ऐ। द'उं दिनें दा एह आयोजन अज्जै थमां शुरु होआ'रदा ऐ।
5. जम्मू च सुक्की ठंडु दा प्रकोप जारी - अज्ज खिते दिएं किश उच्चिएं धारें पर हल्की बर्फबारी दे असार न।

<><><><><><>

Vande Matram (Song)

राश्ट्री गीत "वंदे मातरम" दे 150 बरे पूरे होने दे सरबंधे च अज्ज लोकसभा च बशेश चर्चा शुरु होग। अधिकारिक सूतरें मूजब- प्रधानमंत्री नरेन्द्र मोदी- लोकसभा च चर्चा दी शुरुआत करगंन। इस बशेश चर्चा लेई 10 घेंटे दा समें मुकर्र कीती गेदा ऐ। इस बारे मीडिया गी जानकारी दिंदे होई संसदी मामलें दे मंत्री किरिन रिजिजू होरें दस्सेया जे एह बशेश चर्चा दपैहरी 12 बजे थमां शुरु होग। उनें इब्बी दस्सेया जे लोकसभा स्पीकर ओम बिरला हुंदी प्रधानता तैहत लाई गेदी सब्भनें पार्टियें दी बैठक च एह फैसला लैता गया जे "वंदे मातरम" गीत पर बशेश चर्चा 8 दिसम्बर गी होग ते फही 9 दिसम्बर गी चुनावी सुधारें बारे चर्चा करोआई जाहग।

<><><><><><>

BRO Poonch (Byte)

रक्षामंत्री राजनाथ सिंह होरें बन्ने आले जिले पुंछ च 4 इशारिया 8 किलोमीटर लम्मी सिड़क सने मुख्य भरें च होरनें बड्डी ढांचागत परियोजनाएं दा कल वर्चुअल ढंगै कन्नै उदघाटन कीता। पुंछ जिले च खेत इलाके गी CRP ढोग कन्नै जोड़ने आली इस सिड़कें दा निर्माण सीमा सिड़क संगठन आसेया कीता गया ऐ ते ऐ ते मेद कीती जा रदी ऐ जे ए नमी सिड़क दूर-दरेडे इलाकें तोड़ी सम्पर्क स्थापित करने ते मुकामी समुदायें लेई आर्थिक गतिविधियें गी बढ़ावा देने च बड़ी महत्वपूर्ण साबित होग। जिला विकास कमीशनर अशोक कुमार शर्मा होरें आखेया ऐ जे BRO दियें जारी परियोजनाएं दा मकसद इलाकाई सम्पर्क गी तगड़ा बनाना ते बन्ने आलें जिले च बसनीकें दे जीवन स्तर गी उबड़ा चुकना ऐ। उने आखेया.....(बाईट)

<><><><><><>

Hideout Busted Doda

सुरक्षाबलें जंदे रोज डोडा जिले दे ठाठरी इलाके च इक तपाशी अभियान चलाया ते आतंकवादियें दे ठकाने दा कामयाबी कन्नै पता लाया। इस कारवाई दौरान जम्मू-कश्मीर पुलस दे स्पेशल ऑपरेशन ग्रुप नै बड़ी मती मात्रा च थहेयार ते गोला-बरुद बरामद कीता- जेदे चलदे आतंकी गतिविधियें गी अंजाब देने आस्तै इंदे इस्तेमाल गी रोकेया जाई सकेया। पुलस अधिकारियें दस्सेया जे एह बरामदगी खिते च रमानदारी ते स्थिरता बनाई रखने च सुरक्षाबलें लेई इक महत्वपूर्ण उपलब्धि ऐ। मुकामी पुलस थाने च सरबंधत धाराएं तैहत मामला दर्ज कीता गया ऐ ते इस आतंकी ठिकाने गी बनाने आहले लोकें दी पंछान करने आस्तै अग्गे दी जांच कीती जा रदी ऐ।

<><><><><><>

DGP Katra

पुलस महानिदेशक नलिक प्रभात होरें जंदे रोज रियासी जिले च माता वैष्णो देवी हुंदी पवितर गुफा च सुरक्षा इंतजामें दा जायजा लैता। अपने दौरें दौरान DGP होरें कटड़ा ते एहदे आले-दोआले दे इलाकें च सुरक्षा सरबंधी त्यारियें दा जायजा लैने लेई जम्मू- कश्मीर पुलस- सी.आर.पी.एफ ते श्राईन बोर्ड दे अफसरें कन्नै इक सांझी बैठक लाई। उनें श्रद्घालुएं दी सुरक्षा गी यकीनी बनाने आस्तै मता सौहगा-सतर्क रौहने पर जोर दिता। अधिकारियें दस्सेया जे इस समीक्षा दा मसकद सुरक्षा एजेंसियें बश्कार तालमेल गी निग्गर करना ते तीर्थयात्रा गी सुचारु ते सुरक्षित तरीके कन्नै करोआने लेई उपाएं गी होर बधाना ऐ।

<><><><><><>

IIT Jammu (Byte)

IIT जम्मू अज्जै थमां स्मार्ट इंडिया हैकेथान दे साफ्टवेयर संस्करण दे गैंड फिनाले दी मेजबानी करा रदा ऐ ते ए कार्यक्रम कल 9 दिसम्बर तोड़ी चलोग। ए लगातार दूआ बरा ऐ जिसलै IIT जम्मू बड़ी मती प्रतिष्ठा आले राश्ट्रीय स्तर दे इस आयोजन दी मेजबानी करा रदा ऐ जेदे च मुख् भरै थमां काबल नौजवान हिस्सा लैने लेई आए दे न। इस दरान कुल 20 टीमां असल दूनिया दियें चुनौतियें दे हल विकसित करने लेई 4 बड्डी समस्याएं पर कम्म करगंन। प्रधानमंत्री नरेन्द्र मोदी इनें प्रतिभागियें गी सम्बोधित करगंन ते इंदे नै गल्लबात बी करगंन। इस सरबंधै च होर जानकारी दिंदे होई IIT जम्मू दे चीफ इनोवेशन आफिसर प्रोफैसर M.T. अरविंद होरें आखेया.....(बाईट)

<><><><><><>

Satish Public Darbar (Byte)

खेड्ड मंत्री सतीश शर्मा होरें कल खौड इलाके च इक जनता दरबार लाइयै लोकें दियें समस्याएं गी सुनेया ते उन्दा नेबड़ा बी करोआया। इस मौके पर मकामी बसनीकें जेडे मामले मंत्री हुंदे अग्गे रक्खे उन्दे च राशन दी बंड- सिडक सम्पर्क- ट्रांसपोर्ट- पीने आले पानी ते डिजिटल सेवाएं कन्नै जुडे दे मामलें मुख् तौरा पर शामिल हे। इस मौके पर बक्ख-बक्ख मैहकमे दे बड्डे अधिकारी बी उत्थे मौजूद हे- जिनें इस गल्लै गी यकीनी बनाया जे लोकें दियें समस्याएं पर समें-बद्ध ढंगें कन्नै कारवाई कीती जाई सकै। मंत्री सतीश शर्मा होरें खासतौरा पर ग्रामीण ते बन्ने आलें इलाकें च सेवाएं दी दस्तयाबी-मैहकमे बश्कार तालमेल ते जवाबदेही दी जरूरतें पर जोर पाया। एदे इलावा उनें सरहदी सैलसफा दी समर्थ पर बी लौ पाई ते आखेया

जे एदे कन्नै आर्थिक गतिविधिये ते कम्म-रोजगार दे मौके गी बढ़ावा मिली सकदा ऐ। मंत्री होरे आखेया.....(बाईट)

<><><><><><>

Jasmine Room Freshener

केन्द्र सरकार दी “पी.एम. धन-धान्य कृशि” योजना दे तैहत मुख्य भरे दे बक्ख-बक्ख जिले च ग्रामीण स्तर पर कम्म-रोजगार दे मौके होर बेहतर बनाने लेई मकामी राई-बाई उत्पादे गी बढ़ावा दिता जा रदा ऐ। जम्मू-कश्मीर दे किश्तवाड़ जिले च इक मकामी करसान उत्पादक संगठन यानि FPO कन्नै जुड़े दे करसाने मकामी उत्पादे दा इस्तेमाल करदे होई- कमरे गी खशबूदार बनाने आला इक Jasmine Room Freshener विकसित कीता ऐ। सरबंधत अधिकारिये दा आखना ऐ जे इस उत्पादन दे केई सारे फायदे न कीजे इसी बनाने लेई शुद्ध मकामी उत्पादे दा गे इस्तेमाल कीता गेदा ऐ। अधिकारिये लोके गी गुजारश कीती ऐ जे ओह इस चाली दे मकामी तौर पर बने दे राई-बाई आधारित उत्पादे गी अपनाइये करसाने दी मदद करन ते ग्रामीण अर्थबवस्था गी उबड़ा चुक्कने च अपना योगदान देन।

<><><><><><>

Weather Update

जम्मू खिते च खुशक ठंडू दा प्रकोप जारी ऐ। मौसम विभाग मुजब अज्ज किश उच्चिये धारे पर हौली बर्फबारी होई सकदी ऐ। कल 9 दिसम्बर शा लेइये 13 दिसम्बर तोड़ी मौसम अद्दुब्बे तौर पर बदलोखड़ा बने दा रौहग ते इस अवधि दौरान तापमान होर हेठ आई सकदा ऐ। विभाग नै लोके गी सलाह दिती ऐ जे ओ ठंडू शा बचने लेई लोइचदी ऐहतियात बरतन ते मौसम सरबंधी ताजा जानकारियां हासल करदे रौहन।

<><><><><><>